

Radio Science Serial
SUSTAINABLE DEVELOPMENT
LIFE MUST GO ON-LIFE JAI THAKI BOLE LAGE
'AWAKENING'
EPISODE-05

Etu bar laga episode te, global level te, International Co-operation - mili kena sustainability, mane khotom nahoi kena jai thaki bole, etu kotha khan sai lobo nimate, kiman jaruri ase, etu huni pabo. Earth laga hawa- paani, social aro economic kotha khan sop phele para sabo lage aro sop se dagor sa bole laga tu, amar khan mon te rakhi bole laga tu ase. Duniya sop jaga te, a-ge jabole laga tu, eki hobole lage, kile mane a-ge kuri bole naparea, piche te ahea khan para, sop ke piche te tani lobo. Amar khan thaka jaga te ki pai ase, etu khan kanoon hisap te bhak kuri bole lage aro Earth upor te ki kuri le bhal hobo lage etu bi eki para bhak kuri bole lage. Etu upor te global para bi bishi kam tu loi ase. Etu episode te global Consensus- manea aro goals- pungchi bole tu kiman jaruri ase, kisoman huni pabo. Toh..... der nakuri kena hunea suru kuri bo, episode 5 'Awakening'- Jugai topic dramatize te.

SFX: Children in auditorium. static mic switch on, faint sound of Hello..Hello mic testing.

Teacher- Good morning children! apunar khan auditorium te ki nimate jama hoi ase, jani bo mon hoi thaki bo. Amar khan logot, yate ahi kena ase, Kumari Lydia. Tar tu etu school te purikha kuri thaki she. Etu saal tar Sustainable Development kam upor te Green- Globe Award pai she.

SFX: Clapping

Apunar khan Sustainable Development koa tu ki ase, jani kena thaki bo koi kena ami umeed ase. Etu mane, ahi bole saal- generation khan bi ki lagi bo pabo nimate, amar khan etu ke bhabana kuri kena, etea aji kali lagea ke husair para cholai kena he thaki bole ke koi. Development tu, manu ki lagi ase etu te he kam tu kuri bole lage.

Ajai- Aji kali lagea.....etu mane ami khan, bachha khan bi ase nah?

Teacher- Hoitoh! kile naho bo. Apunar khan bachha ase koa nimate, sustainable development te bhak na lobo lage, etu tu nai dae. Aro ahi bole saal- future mane- apunar khan laga great grandchildren (**Children laughs but teacher conti..**) aro tar khan laga great grandchildren khan bi.... sop manu bi, etu prithibi te a-ge nahoi le ba piche te jonom hoa khan ke koi ase dae. (slight pause) Ah! Lydia ahi she. Bachha khan Lydia ke welcome kuri bi.

SFX: Clapping

Lydia- Khushi pai she Sir. Purikha kurea school para, ami ke enika swagat dea nimate, ami bishi khushi pai ase. Jai ja student hisap te, etea noutun

student khan upor te, ami bi kam kuri bole tu ase, kile mane tar khan etu school te naha a-got, ami puri thaki she, tar khan, school laga naam u-cha tak te pungchai thaki bo nimite, ami ki pari ase, etu tar khan ke hikai di bo lage.

Shashi- Sustainable Development nishina..... etea amar generation khan, ahi bole generation khan duk napai kena thaki bo nimite, amar khan sai dibo le kam ase. (**all laughs**)

Lydia- Ekta phele apunar bhabana bi thik ase. Toh..... ami ke kaun sawal hudi bo mon ase?

Ajai- Ami! morom para.... amar laga naam tu Ajai ase. Ami baro saal ase. Aro ami kitea bi, etu kotha huni sa nai. Amar khan kile Sustainable development lage?

Lydia- Achha! Ajai, apunar ekdom dorkar sawal hudi she. Enika phele para bhabi sabi. Amar khan maa prakiti para sop nishina pai, hoi na nahoi? (**R**) kisoman khan saas lobole pare hawa, ami khan daam natha ki kena pai, ami khan hawa tu nakine toh nah? (**R-hoi!**) kintu, a-lak khan upor te, amar khan pusna u-la bole lage.....kheti bari manu khan nishina, anach khan laga bo nimite, kam kuri bole lage, ami thik koi she nah?

Kids- Hoi ! !

Lydia- Toh.... amar khan mati para ki pai le bi, etu khan sop tu resources ase. Buji ase nah? (**kids chorus-Hoi!**) Aro duita bhak te ase. Renewable aro Non- Renewable. Etu mane, ako bi bana bole pare aro bana bole naparea.

Teacher- Bachha khan..... , Non- renewable resources naam para, apunar khan buji pai ja bo, etu khan tu pa komti ase dae. Khotom hoi she koile, ako napa bo.

Lydia- Hoi, renewable te tu, amar khan a-lop mon aaram te thaki bole pare. Kile mane, etu khan tu, hawa- paani para, khata homoi karone akobi banai lobole pare.

Ajai- Morom para kisoman Eg: khan koi dibole pari bo?

Teacher- Koi di bo Ajai. Gham bi renewable resources te lobole pare. Hawa energy bi. Anach khan bi dusra ekta ase. Juntu- jaanwar jati khan bi, bachha pai, toh..... etu khan bi renewable resources ase. Kintu, jati kaun nu ba morai- morai kena nahoi le ba, tar thaka jaga beya kuri di kena, hara bole dishe koile, etu jati khan tu, kitea hoile bi napa hoi ja bo.

Lydia- Amar khan minerals pabo nimite, mati khunde. Amar khan oil wells khan ase, yate para amar khan petroleum pai. Toh..... judi war somoi te,

etu oil wells khan jui julai dishe koile, ki hobo? Nahoi le ba, mine para, sop minerals khan khundi kena u- lai dishe koile ki hobo?

Kids- Tel aro kaala pather khan amar khan na lagai. Non- renewable resources hobo. Sop khotom hoi ja bo. Eku bi natha ka hoi ja bo.

Teacher- Thik koishe.

Lydia- Judi prakriti te thaka resources koa khan sop khotom hoishe koile, apunar ki kuri bo?

SFX: Total silence for few secs.

Ajai- (Hesitant) Ami khan mori jabo.

Lydia- Hmmm.....amar khan dusra raasta ase na nai sai sa bo dae! kiile mane, harai ja bo kotha tu, option nahoi (laughs). Judi Mother Earth tu, awaaz ase koile, tar ki koboetu upor te, ami chhoto ekta stage show dikhai di bo. Bhal para huni bi.

Mother Earth-Manuhar khan prithibi te, jitea ahi kena thaki jai she, saal 2100 pungchi kena, 10 million upor hobo koi kena bhabea nai. Manu nahoa khan ami kinti kurea nai. Ami manu ke kha loa di bo lage, kapra pindai di bo lage aro bohi bole jaga di bo lage. Tar khan bira bole mon ase aro ekta jaga para a-lak jaga te tar khan laga saman khan loi jabole mon ase. Toh.... etu pari bo nimite, resources, ami dibole u-lai. Sop manu ba sop desh khan eki tu nahoi.

*Kaun nu ba tu, thakea para bi arobi bishi lobole mon thake,

SFX: Dibi, dibi.....aro bi dibi.....

*Kaun nu ba tu ene phelai. Aaram para thake.

SFX: Flushing of water

* Kaun nu ba tu eku najane, ami para ki di ase, khushi napai.

* Bishi manu tu duk- dhukea te ase, aro ami para dea tu, tar khan chola bole napare.

SFX: Sobbing.....Ami bhuk lagi ase,.....Ami thanda lagi ase....Ami kapra lage

* Manuhar khan upor te ami duk hoi she. Ami naparea hoi ase. Kaun nu ba khan, dikdari ulai ja ke, buji pai loishe....Kintu tar khan hili bole lage. Ami modot lage.

SFX: Sobbing

Kids- Mother Earth bishi mon chinta hoi she. Amar khan kinika modot kuri bo?

Teacher- Etu dikdari tu, prithibi te, sop manu mili kena he paribo. Hoi! ekjon- ekjon para bi pari bo.

Lydia- Judi amar khan sustainability lagi ase koile, sorse poihila amar khan tin-ta dorkar issues- kotha jani bole lage. Etu tin-ta khan tu ase- Social issue, Economic aro Environment.

Shashi- Toh..... economic development, social development aro environmental protection tinta tu, sustainability te a- sol pillar tinta ase.

Teacher- Bhal para koi she Shashi. Apunar khan kitea enika bhabi bo, titea apunar khan buji ki....ekta theng komjori hoishe koile, system tu a-ge jabo napari bo.

Shashi- Etu tinta pillars karone, a-lak, a-lak organization ase na nai? nah.... ekta he ase.

Lydia- National aro International bishi bhak te, kam dea tu hoi le, ekbar para nahoi kena, ekta- ekta te sai. Kotha- kotha United Nations Environmental Prog: (**UNEP**) aro Environmental Protection Agencies (**EPA**) bishi desh te, Environmental pillar ke bishi sai.

Kids- Achha....

Lydia- Hoi... aro World Trade Organization (**WTO**)para economic phele sai dea.

Kids- Oooo.... achha...

Lydia- Organization for Economic Co-operation & Development (**OECD**) para economic aro social sustainability, etu mane, war ke kinika kuri le komti kuri bo aro justice nishina khan sai. United Nations para, etu tinta ke dakat banai di bole koshish kure.

Teacher- Mon duk ekta tu, amar khan global aro International te, etu tinta sabole, etea tak eku mon di kena nai. Mane, ekta organization bi nai.

Lydia- International para amar khan aste- aste para pa tu pai ase, enika organization nishina u-lai jabile bi pare.

Ajai- Etu te alak- alak desh khan, kinika eki logot ahi ase?

Shashi- Mati te ki- ki pa khan upor te, dhun desh khan, tar khan laga bhabana tu a-lak hoi. Tar khan tu hoile, khundi kena arobi bishi u-tha bole te he mon dea. Duk te thaka desh khan laga bhabana alak. Kile mane, tar khan ekdom lagea jinis te haat jabile napare.(**a bit upset & angry tone**) Kuri bole parea laga desh khan aro u-thi thaka desh khan, agenda ekta te monjur kurea tu, ami bisas bi kuri bole napare.

Teacher- (**Warning Tone**) Sashi, etu upor te apunar beya pabole kam nai toh. Lydia para ki koi ase, huni bi nah. International Co operation tu hoi ase..... aro ahi bole saal khan te, apunar bishi dikhi ahi bo dae! Sustainability nimite, etu tu hobole he lage.

Lydia- Hoi, hobole he lage. Saal 1972, Stockholm te Human Environment, mane- manuhar khan nimite, sapha hawa - paani upor te sorse poihila

United Nations Conference thaki sele. State laga dagor duijon, Sweden para Olaf Palme aro India para, Indira Gandhi bhak loi she. Global Environment kinika ase, etu ke sabole, first conference thaki she.

SFX: Clapping

Teacher- Conference te globally para hawa- paani upor te, International phele kinika thaki ase, etu kotha khan mili kena koi ulai she. Development aro Environment majote kinika ase, etu bi manu khan ke jani bole dishe. Etu pichot din khan upor te ki hoi ase, duniya para ekdom jani bole mon hoishe. Aro, United Nations Environment Prog: (**UNEP**)tu ban u-lai she.

Lydia- Umhu....bees saal nishina pichot, Rio de Janeiro te, Environment aro Development upor te, 178 national sorkar para, state heads ek- sau upor, United Nations Conference te jama kuri she. Etu tu, 1992 Rio Earth Summit ekdom naam dagor kama ekta hoi she.

Sashi- Oh toh.....manu khan nijor desh ekela nimate , nabhabi kena , Earth karone bhabana kuri she nah? Bhal ase, enika hobo lage. Amar khan, ami laga hawa, ami laga samundar koi kena, a-lak, alak rakhi bole napari bo. Hoi na nahoi? (**Teacher- Umhu...**) Pollution- moila- letra tu national sima khan te jai- jai kena moila kuri bole ase.

Teacher- Etu he toh! Development, kam khan bana bo nimate, International te, sorse poihila koshish kurea tu, etu he hoi. Etu summit te, Bio- diversity Convention kotha bi koi u-lai she.

Lydia- Hoi, India bi sign kuri she. Bio diversity bachai rakhi bo nimate monjur kuri she, bhal para cholai kena aro, genetic para bhak kuri bole bi kotha u-lai she.

Sashi- Hoi, jati ekta khotom hoi she koile, prakiti te, pa khan harai jabo. Sustainable Development tu hoile prakiti te ki, ki pa khan upor te ase. Kheti.... dawai bana khan aro dusra bio technology te industries khan karone ki lage koi le, gaas- paat aro juntu- jaanwar jati khan para genetic saman khan tu lage. Etu para he sop tu suru hoi.

Lydia- Aro amar khan kitea ba tu, jati ekta bhal para puri kha nakurea nimate, amar khan nimate ki karone bhal ase najane, judi harai jai she koile, amar khan cholai kena laap pabole thaka tu napa hoi jai.

Teacher- Hoi, bio diversity te, biological ke bhal para bachai rakhi le bhal ase koa tu, duniya poihila chini pa u-lai she. Aro, manuhar khan bi chinta kuri loi she.

SFX: Clapping & Music

Ajai- Sir! toh....kam khan arobi nakurea a-got, bees saal nakuri kena thaka mane- gap thaki she?

Teacher- (**Laughs & say**) Nai....nai...din khan bishi beya hoi ja nimate, bishi International agreement khan sign kuri bole he lagi jaishe. Kotha- kotha,-

* Saal 1978 Great lakes Water Quality Agreement (**SFX: cymbals in all the ***)

* Saal 1979 te, Long-Range Transboundary Air Pollution upor te, Geneva Convention.

* Saal 1985 Helsinki Agreement.

* Saal 1988 te, substances para, Ozone Layer Deplete upor te, Montreal Protocol. Aro,

* Saal 1989 te, Transboundary Movements of Hazardous Waste upor te, Basel Convention.

Lydia- Hoi le bi, Sustainable Development koa tu hoi le, amar khan 1987 saal para he jani she.

Sashi- Toh..... etu mane, noutun modern term ase nah?

Lydia- Hoi. Environment aro Development upor te, UN General Assembly para, World Commission banai di she. Yate, Chairperson tu, Norwegian Prime minister Gro Harlem Brundtland thaki she. Toh... report ke tar naam dhuri kena rakhi di she.

Teacher- Achha bachha khan apunar khan huni kena khushi pai ase na nai?

Kids- Khushi pai ase.

Teacher- Umm...Brundtland report ki koi she koi le, (pause) apunar khan matha guri bole ase. (**laughs**)environment aro economic duijon ke shaadi kuri di bole homoi pungchi she koi she.

SFX: kids in confusion, murmuring

Lydia- (**Laughs & say**)Apunar khan environment aro economic ke kinika shaadi hobo koi kena matha guri ase nah?

Kids- Hoi

Teacher- (**Laughs**) Ami koi she nah, matha guri bole ase. (Kids laughs) Ami bujai di bo. Ki- ki kam kurea, mane- khundea, bana aro banai kena ja, transport, kha aro cholai loi kena phelai dea nishina khan, hawa- paani ke choi dea. Etu khan sop para, letra ako bi kuri dea. Toh..... yate, economic development -saman chola aro environment majot te eki ekta te ahi jai.

Kids- Oh! ami khan tu etu phele bhabea nai.

Lydia- Hawa- paani ke na bhabi kena economic a-ge jabole he bhabi le ekdom beya para environmental ke botli kuri di bo.

Sashi- Apunar thik koi she Ma'am Ami kitea school te ahe, factory para, kaala dhunga aakash te uthi kena ja dikhi thake. Ami laga ghor u-sor te thaka bishi manu, saas lobole dikdar pa bi ase. Ami amma bi, hodai kherki khan bon kuri kena he thake, aro hawa- paani sapha nai koi thake.

Teacher- Apunar amma hosa kotha koi she Sashi. Jai ja 50(pachas) years te, Earth's eco system, 60% te giri she. Saal 2040 pungchi kena tu,

Earth's bio- capacity para, amar khan, prakiti para pai kena u-thai loa, 170% te u-thi bo.

Lydia- Apunar khan etu khan sop bhabi bi. Ghor ja pichot apunar khan, arobi etu kotha khan jani bo nimate, Google kuri bi. Prithibi te, Sustainable Development pungchi bo nimate, ki kadam loi kena ase, etu upor te, apunar khan aha kali, likhi kena dikhai di bi.

Kids- Achha! Thank you.

SFX: Noise, chairs etc

Ajai & Sashi walking home. (**SFX: Footsteps & street noise**)

Ajai- Sashi dada, (**R**) baba para nah (**R**) America aro Europe desh khan develop ase koi she. Tate manu khan tu dhun ase hola! Ami khan tu, develop nahoi.....bishi bar baba para, 'ami khan poisa nai, enika he koi thake. Sop manu gari bi nai. Dhun manu khan he saman bishi cholai naki...?

Sashi-Asani nahoi dae Ajai. Apunar laga asani sawal tu, kha - chola laga hisap te ase, aro global scale te, kha- chola patterns ase.

Ajai- Apunar hisap te, pu-ra duniya?

Sashi- Hoi, manu kiman bishi hobo, kha- chola bi bishi.... 2050 pungchi kena tu, Earth te 9 million nishina hoi jabo. Eman jon manu khabi khabo, chola bi chola bo. Komti bi hobo pare, bishi bi hobo pare, kintu sop manu bi kisoman pa khan tu chola bo.

Ajai- Oh toh.....! kha aro chola laga volume bi u-thi bo.

Sashi- Etu upor te aro, 2030 saal pungchi kena tu, prithibi te middle class tu tin bar te u-thi bole hoi ase. Tar khan ki kuri bole mon ase aro sapna khan pungchai di bole khujish kuri bo. Income group u-cha te thaka khan, ki hoile bi aste tu na kuri bo. Manu khan mangea hisap te ako bi bishi, bishi bana bo. Baba para ami ke koa, etea bi mon te ase. Saal 1990 aro 2002 majot, income- pa u-thea tu, 21% ase koi she.

Ajai- (**Emotionally**) Jiman poisa, jiman phela bole dakat. Kini thaki bole he ase. Etu ke kinika aste ba komti kuri di bo? Ami bhabea hisap te, dagor manu khan kiba ekta tu kuri bole lage. Lagea aro bana ke kinika rukha bo..... prakiti te pa khan sop khotom hoi jabo. Aro.... aro, ki hobo? kaun logot te bi eku natha ka hoi ja bo.

Sashi- Apunar bishi mon duk nakuri bi Ajai. Duniya pura laga duk tu, khali apunar pukhi bole nahoi. Ami bhabea hisap te, sop desh khan kuri bole lage aro mili bole lage. Kile mane, ami khan khali ekta Earth he ase. Leaders khan bi bhabi kena he thaki bo.

-Music-

Ajai - amar u-sor te ahi kena bohi bi. Sustainable Development koa tu Google kuri bo.

SFX: Chair dragging & keyboard being punched

Choh! sabi!

Ajai- (**Happily**) dada apunar bishi pai she dae! Joldi puri bi. Oh! etu ke poila puri bi. September 2000 Millennium Summit ase.

Sashi- Likhi ase.....aata international developmental goals thaki she, aro ek-ek goals te, kitu pungchi bo lage aro tarik khan bi ase koi ase.

Ajai- Goals khan tu ki- ki ase dada?

Sashi-

- Ekdom duk dhukeya aro bhukha ke hatai di bo (SFX: cymbals)
- Primary education sop ke di bole
- Mota- maiki eki aro women ke empower di bole
- Bachha morea komti kuri bole
- Bachha jonom dea maa khan gao ke bhal sabole
- HIV/ Aids, malaria aro, dusra bimar khan jiti bole
- Environmental Sustainability thaki bole
- A-ge jabo karone, global partnership bana bole

SFX: Door opening

Mom- Sashi, Ajai,! duijon computer te ki kuri ase? bahar te khili bole naja bo?

Kids- Nai amma na jabo.

Ajai- Amma, Sustainable Development upor te duijon likhi bole kam paishe. Dui jon tu nah! (R)etu century suru phele, duniya he 2000 te, haat milai kena, eki logot kam kuri bole bhabana loi loa dikhi she.

Mom- Duijon tu Millennium Development Goals kotha koi ase naki? deadline tu, 2015 thaki she. Noutun Sustainable Development agenda te, bishi desh khan, kuri bole pari bo nimite, saal 2015, Sept 25 te, goals khan banai she. Ekta- ekta goals te alak-alak kam thaki kena , ahi bole pondro saal khan te, etu ke kuri kena pungchi bo lage. Toh.... duijon, noutun khobor nimite, Sustainable Development Goals 2030 koi kena Google kuri bi.

Sashi- Toh! etu pondro saal khan te, global cooperation para, eku kuri bole parea nai? Amar khan kile , dusra deadline lage?

Mom - (Urgent tone) Nai, Nai! Nahoi! bishi kuri bole pari she. kha bole napai kena duk thakea khan, ekdom nami she. Bachha morea bi nami she. Mori bole thaka ke bi jinda, aro life thaki bole tu bi, u - thi she. Sapha paani aro sanitation bi u - thi she.

Ajai - (Confuse tone) Enika bhal khan hoi she koile, saal 2030 karone, kile noutun deadline?

Mom - Absos, mon duk ekta tu, duniya te, sop desh khan, a - ge jabile te, eki hoa nai. Etea tak bi, desh khan majot eki te ahi bole napari kena ase.

Sashi - Hoi, kintu , desh bitor te bi duk - dhukea tu town khan te thaki le bi, bosti jaga khan te bishi ase, khobor nadea tu he ase, kintu u - thi ase. Ami school ja somoi te dikhe, railway platforms aro dolang niche te ghor nathakea bishi manu ghuma dikhi thake.

Ajai - Hoitoh. Etu dukhea manu khan tu khali ghor nathaka ekela nahoi, Tar khan poisa bi nai. Khabole karone aro kapra nimite kitea ba bhik mange.

Mom - Ajai, dhukea tu nah, income - pa aro ki ki khan pai nah? etu khan komti pa para bi dagor ase, apunar etu khan buji pabole etea bi huru ase.

Sashi - Ami aha kali school te, sustainable development Goals 2030 upor te kobole ase, ami chart bana bole lagi ase dae. Oh! sabi toh! Google te enika koi kena ase - saal 2012 Rio De Janeiro te, Sustainable Development upor te, The sustainable Development Goals (**SDGs**), United Nations Conference te jonon hoishe koi she. Lydia didi para , amar khan ke koa tu , first Earth summit Rio te... etu he agenda a - ge loi ja hobo koi she. Ami etea para suru kuri bo.

Ajai - Apunar ke ami modot kuri bo dada. Tar laga Goals khan sopse poihila likhi lobi.

(To take turn in reading out Goals).

Saatra sustainable development goals:

Sashi - Saatra Goals ase. Ami poihila puri lobole lage.

- Goal ek - Sop jaga te, ki phele para hoilebi , duk - dukhea khotom kuri bole,
- Goal duita - Bhukea khotom kuri bole, kha - loa phele pungchi bole lage aro, nutrition bhal bana bole aro kheti phele pai thaki bo nimite sa,
- Goal tinta - umer sop karone, gao bhal thaki bole sa,
- Goal Charta - Sop manu eki education dibole aro jinda thaka tak puri thaki bole parea,
- Goal paasta - maiki - moita eki aro maiki - swali sop ke empower di bole,
- Goal choita - Sop manu nimite, paani aro sanitation pai thaki bole,
- Goal saata - Sop manu dibole parea ba kini bole parea aro mon chinta te nathaki bole, modern energy dibole,
- Goal Aata - Sop manu ke, kam di kena , aro etu para bhal u - la bole aro sustainable development economic growth a - ge jai dibole,
- Goal nouta - Infrastructure bhal bana bole aro noutun bhabana para ki ki bana ke sa.
- Goal Dusta - Desh bitor aro desh majot eki nahoa ke komti kuri bole. Ajai baki goals khan apunar purai di bi.(R-Achha thik ase)
- Goal Ekgaro - Kha ba chola aro upjani patterns sustainable bana bole,
- Goal baro - Cities aro manuhar khan thaka jaga khan ke safe aro bhal dibole,

- Goal tero - Din botli - climate change aro din botli hoi ja para beya ahea ke sabole aro kam kuri bole,
- Goal chouda - Sustainable development karone, oceans, seas aro paani te pa khan ke bachai rakhi kena aro pai thaki bo nimite chola bole.
- Goal pondro - Mati te ecosystem khan ke , bachai dea - bhal rakhea aro pai thaki bo nimite chola bole promote kurea, jungle khan ke bhal para sa, khali, suka jaga khan te bi kam kuri bole aro mati harai ja khan ke bi rukhai dea aro biodiversity noksan ke bi rukha bole,
- Goal sola - A - ge jai thaki bo karone , peace aro societies bitor te bi etu thaki bole promote kuri bole, sop upor te justice dibole aro institutions sop phele te bi pa bole,
- Saatra - Ki banai kena ase etu ke dakat ba taan banai dibole aro sustainable development karone, global partnership ke akobi bhal bana bole.

Sashi - Etu khan puri dea pichot , ami kiba ekta bhabi loi she.

Ajai - Ki dada.

Sashi - Sustainable development Goals 2030 te ki ase koile, sop! zero poverty para loi kena, zero hunger -dhukea, bhukea, gao - bhal , pura - likhea bhal dea aro maiki mota alak na sai kena eki, etu khan ase dae.

Mom - Enika hobo lage. Globally! nouta manu te ekjon tu, komjori thake. Etu te bishi manu tu, a - ge jabole desh khan te ase. Toh... society te bishi manu khan karone bhal khobor ase. Nutrition napa nimite, bachha umer paas saal niche khan, aadha nishina mori jai. Etu mane hodai saal 3.1 million bachha laga life tu khotom hoi. Bhabi sabi, amar khan, etu goals khan kuri bole pari she koile, kiman tak botli hobo.

Ajai - (**Excitedly**) Sapha paani, sanitation, amar khan lobole parea sapha energy , samunder aro mati, etu khan sop bi ase dae!

Sashi - Aro etu upor te, bhal khan aro economic bi u - thi bo, innovation, eki nahoa bi nami bo, sustainable cities, ekdom bhabana thaki kena he kha aro chola bi thaki jabo, din laga nium upor te kamjari loa thaki bo aro goals khan sop pungchi bo nimite , mili kena kam kuri bo. Ami tu bishi pai she, tar khan , sustainable production - bana phele ba pa phele aro chola ba kha phele mon di kena sa nimite, bishi khushi pai she, A - sol tu etu he hobo koi kena ami bhabe.

Ajai - Kaun etu khan sop kuri bo?

Mom - Yate, hatyar sorse dorkar tu thik para science chola tu ase dae! Ajai sustainable Development goals kotha te, ami khan sop bi ase dae. Amar manuhar khan, bhal para thaki bole aro planet bi, eku te bi komti na hoi kena thaki bo nimite, etu khan mani bo lage

Sashi - Etu international goal khan upor te. UN Secretary - General Ban ki - Moon para koa bi ami dhali bo. Tar koishe, (**Reads in serious voice**) saatra sustainable Development Goals (**SDGs**) khan tu, World leaders aro manu khan majot te, manu nimate aro social contract karone, etu eki logot sapna tu dikhi bole karone ase. Etu khan tu , manuhar aro planet nimate kuri bole laga, aro kuri kena pungchai dibole laga blue print ase.

Mom - Ami bhabea hisap te, Mahatma Gandhi tu, tar homoi para bi bishi a - ge jai thaki she naki., Tar para koa tu hoile, amar khan Earth te , sop manu lagea tu ase, kintu sop manu bi bishi bishi lobole mon hoa tu napari bo koi she.

Ajai - Hoilebi ami kinika jani bo, ami lagea ase nah... amar laga greed ase. Ami eman bishi jinis lage.

Mom - (**laughs**) Ajai bishi asani ase dae. Lagea, koa tu hoile manu ekjon para , natha kile jinda hobole naparea etu ke koi. Toh... apunar ki lage ase, tinta kobole pari bo?

Ajai - Hmmm... natha kile jinda hobole naparea? Asani!! ase! hawa paani aro kha - loa.

Mom - Hoi! Lagea koa tu hoile natha kile , apunar jinda hobole naparea ke koi. Kintu , kitea bi a - lak bhabana mane.....

Kids - (**laughs**) ... jani ase amma.

Ajai - Apunar ki kobole ase jani ase amma. Amar khan lobole mon thaka tu, kitea bi khotom nahoile, greed koa tu hoi jai. Aro sustainable development te, greed koa tu, etu bi lobo! arobi lobo! u - tu bi lage koa tu dusmaan ase. Hoi na nahoi amma.

Mom - Hoi toh. Aro, etea tu, manu, tar nijor.... aro kaun nuba desh te ahi bole din khan bhabana nakuri kena thakea upor te, global leaders khan, yate dikdar ahi ja ke dikhi pai jai she. Tar khan, school bachha khan ke, etu upor te hikai di ase aro ahi bole generation te citizens aro leaders khan ke bi hikai ase.

Sashi - Amma , 2030 hoi kena tu, amar khan , sustainable development goals khan sop parea laga dikhi bole umeed kuri bo. Amar khan pari bo he lage. Napari bo koa kotha tu nabha bi bo lage.

--Music---